

Erste Augustrede Mühleberg

Es gilt das gesprochene Wort.

Woni no relativ fräsch ir 7. Klass bi gsi z aelüfte, simer ufne Schuureis – u dert hets für auui Schüeler e Glace gäh, gsponseret vor Gmein mühlebärg, wie üs üsi Lehrerin denn gseit het. So bini zerste mau bewusst mit dr gmein mühlebärg i kontakt cho. Und si isch mir de oh grad uf ahieb sympathisch gsi. Umso meh fröits mi, dsi hüt i dere Gmeind, woni mini Oberstuefezyt vrbacht ha u mir mis Glace finanziert het, darf di ersti ougust red haute.

I ha voremne Monet in Dütschland amne Träffe vode liberale Partie us Dütschland, Östriich und dr Schwiiz, d Schwiiz dörfe gah vrträte. Sehr schnäu hei mini Dütsche Kollege gfragt, wieso d Schwiiz so riich und erfougrich sigi. Und füraue: Wieso mir und üsi Züüg so dermasse pünklech sigi. Bi ihne loufi ja oh viles guet, aber mir ir Schwiz schiine Besserkönner z si. Das isch natürlech Quatsch. Mir si nid eifach besserkönner. Wo üsi Vorfahre im 1848 dr modern Bundesstaat, d schwiz wimerse hüt kenne, gründet hei, simer es arms land gsi. Fasch auui Bewohnerin und Bewohner si eifachi und armi Buure gsi. Grossbritanie oder oh Holland si meh us dopplet so riich gsi zu dere Ziit. Was auso het d Schwizergschicht zur Erfougsgschicht gmacht?

Ganz klar: Es si ganz viu Faktore wo mitihne gspiut hei. D Tatsach, das mir d macht uf so chlini Organisationseinheiten wie müglech verteile, wie zum bispiu üsi gmeindsversammlige. D Demokratie, wo defür sorgt, dass dr Staat mass hautet oder z Milizsystem wo Politiker am Bode vor Realität bhautet. Wemer luege, wasem mir üse Woustand verdanke, de chunnt me um zwöi grossartigi schwiizer Eigeschafte nid herum: Zum eine d Tatsach, das mir nid vor Innvestitone zrüg schrecke und zum angere üsi Offeheit, was Innovatione ermüglicht und ermüglicht het.

D Genies si uf dr Wäut glichmässig verteilt, und doch ghört di chliini Schwiiz hüt zude Länder, wo am meiste Patänt amäude. Üsi Vorfahre hei realisiert, dass nid nur Gold, Erdöl und anderi Bodeschätz wärtvou si, sondern dasses ei Ressource git, wome zwar sehr viu muess investiere, aber oh sehr viu zrüg chunnt: D Biudig! Natürlech hets wehemänti gägner gäh, wome mit dr Idee cho isch, dass me aune Zuegang zur Biudig söu gäh. Das Choschtet, und de nid gad knapp. Aber üsi Vorfahre hei nid nur id Biudig investiert. Sondern si oh angerne Orte wäutwiit ganz vorne mit drbi gsi: Bim Usbou vom Schinevercher. Me het ungloublech viu Gäud investiert, ine Technologie, wo nid auui dra gloubt hei. Dank däm, das mir uf di nöii Technologie vertrout und ungloublech viu investiert hei, isches plötzlech müglech worde, d Güeter wome in Bärn produziert het, oh in Züri, ja sogar im Usland z vrchoufe. Wüume meh Sache het chönne verchofe, het me oh meh Lüüt agsteut und besseri Lohn chöne zahle.

Aber oh üsi Wäutoffeheit het zum Erfoug bitreit. Wo dr gebürtig Dütsch Henri Néstle 1839 us eifache Apotheker id Schwiiz migriert isch, hät niemer dänkt, dass dä Maa fasch 30 Jahr später dr Grundstei leit füre grösst Lääbensmittelproduzent vor Wäut. U glich bini mir sicher, dass niene süsch Nestele hätti chöne entstah. Wo är id Schwiiz cho isch, ischer gförderet worde und het eifach es Ungernähme chönne gründe und i sim Labor a nöiie sache tüftle. Wonr di passendi Zämäsetzig het kah, hets ihm d schwiizer offeheit de oh ermüglicht, z exportiere.

Es angers bispiu wo wunderbar illustriert, wie d Offeheit und die internationali Vernetzig e direkte Ifluss uf Innovatione und so oh ufe Woustand vor Schwiiz het, isch e junge Maa usem Libanon. Wer hätti dänkt, dass z Mlgrantechind Nicolas Hayek es Ungernähme wird gründe, wo d Schwiiz wäutwiit vertritt? Genau das hetr mitr Gründig vor Swatch-Group gschaft. Hüt trifft me ide entlägnetschte Ecke vor Ärde Lüt ah, wo präzisionstechnologie, vrseh mitemne Schwiizerchrütz, am Arm trage ah.

Oder churz gseit: Ig ha ines erfougrichs System dörfe inegebore wärde und ig schätze das Erb woni vo öiich und mine Vorfahre übercho ha, sehr. Aber das Erb wird immer wider bedroht – und das meistens nid vo usse, sondern vo inne. Hüt gseht d Wäut zwiifulos angers us, aus no vor 150 Jahr – und si veränderet sech jedes Jahr es bitzeli schnäuer. Umso wichtiger isches, das mir nid blibe stah, mir nid uf üsne Lorbeere usruhe, sondern d Chance, wo sech biete wahrnähme. Das simer üsne Vorfahre schuudig, aber no viu meh, simer üsne Enkelinne und Enkle schuudig, dass mir ihne e genau so gueti Grundlage hingerlöh, wie mir si hei dörfe übercho.

Stuetnech di Grundlage wienes Huus mit Fundament, Mittubou und Dach vor, wo vo Zyt zu Zyt oh renoviert oder erweiteret muess wärde. Z Fundament si di natürlche Läbensgrundlage – üsi Umwäut, d Natur. Dr Mittubou isch üse Umgang ungerenang und mitenang. Und z Dach si üsi Erungeschafte, wie zum Bispiu d AHV.

Egau ob mir Wasser trinke, Zmittag ässe, üs id Bärge göh gah erhole oder oh scho nur Luft atme: Wie mir d Umwäut behandle het e direkte ifluss uf üsi Läbensqualität und üsi Gsundheit. Und dadruf, ob üsi Enkle oh no die Schwiizer Bärge chöi gah skifahre oder dadafür iz Himalaya-Gebiet müesse. Und für d Umwäut d schütze, müesse mir weder zrügk iz mittuauter, no Freiheite dür Verbot beschränke.

Obschon mir nid besserkönner si, **mache** mir äbä viu sache glich chli besser. Dank userem Innovationsgeist u nöiie Technologie chöi mir üsi Hüser umwäutfründlecher, üses Plastik kompostierbar, dr Pestizidinsatz minimiere und üse Strom CO2 neutral mache. D Tatsach, das mir und üsi Vorfahre, so stark uf Biudig gsetzt hei, ermüglichts, das mir oh ah nöiie umwäutfründleche Lösige chöi Forsch. Jedes Patänt womr amäude bedütet nüt angers, us das mir es nöiis Produkt aus einzigi i di ganzi Wäut chöi vrchoufe – und dadrmit üse Woustand und üsi Arbeitsplätz erhaute. D Technologie und dr Fortschritt isch im Berich vor Umwäuttechnig e doppelti Chance: Zum eine chöi mir dadrmit üsi Verantwortig wahrnäh. D Vrantwortig, dass mir üsne Nachkomme es guets fundament, e intakti Umwäut hingerlöh. Und zum Angere chöi mir einigsch meh imne Zuekunftswisende Berich Pionierin wärde. Entweder wöuu mirs säuber erfinde oder wüu mir richtig i di nöiie Technologie investiere wie scho damaus bir isebahn.

Natürlech ischs gad fürs Klima oh entscheidend, was di angere Länder mache. Aber nid säute simer Vorbiuder gsi, hei angeri Inspieriert, ja gar z gsicht vor wäut veränderet. Üsi humanitäri Tradition und Gründig vom Rote Chrütz zum bispiu hei d Wäut es stück mönschlcher gmacht. Mir hei üs mit erfoug wäutwiit defür igsetzt, dass jedes Mönscheläbe kosbar isch. Mir si immer für üsi Überzügige igstange u hei mitgstautet. I Vereine genau so wie i Internationale Organisation. Höre mir uf, üs chliner z mache us mir si. Nutze mir d Chance und nähme mir üsi Verantwortig und Verpflichtig ärnscht und boue es solids Fundament.

Uf das Fundament chöi mir üse Mitubou – z mitenang - setze. Üsi demokratie läbt vo verschidene Meinige und vom mitenang. Sit jehär setze mir üs a Tisch, diskutiere zämä und am Schluss gfincht me e Mittiwäg. E Wäg, wo auüi Siite e Schritt uf e anger zuegmacht hei. Aber zum Mitenang ghöre natürlech oh z mitenang unger de staate. Gad mitem UNO Sitz in Genf simr oft d Vrmittler zwüsche zwöi vrfindete Staate. Mir si die wo international genauso wie national tragfähig Lösige wie erarbeite. Wo aber oh Wort haute, wemr e Vribarig troffe hei. Und oh im Mitenang gits no viu Chance wome cha nutze. D Chance vor Offeheit. D Offeheit gägeüber andere Mienige und Asichte, fűehrt zu bessere Lösige, wüu meh Perspektive i Lösigsprozäss integriert. U dr Ustusch vo Ideene fűehrt zu nöiie, bessere Ideene. Aber oh d Wäutoffeheit birgt riesigi Chance. Wäre mir nid offe gsi gägeüber däm Migrant usem Libanon, weme nid i sini biudig investiert hät, gäbs keh Swatch group. Und hätte mir nid Handu tribe mit angrne Länder und üs ar globalisierig beteiligt, hätte mir nie Kakaobohne chöne lehre vrarbeite und die besti Schoggi vor Wäut härsteue. D Offeheit macht ds Huus zumne Deheim.

Schliesslech brüche mir aber no es Dach, wo üs vor Wind und Wätter schützt. Und das si üsi Erungeschafte – eini drvo isch z wichtigschte Sozialwärk ir Schwiz: D AHV. I muess gloub nid lang erkläre, das üses wichtigschte Sozialwärk in schief flag grate isch: Und um das klar z sägä, da het niemer schuud dra. Demographie und die gstigni Läbenserwartig hei es Loch vo eire Billion id AHV grisse. Und i weiss nid wies öich giet, aber ig wett mis dach, wo wasser inelaht, müglescht schnäu flicke und nid no 20 Jahr warte. Oh hie müesse mir us Gseuschat zämästah – auüi a ei Tisch hocke und wie mir ds bi angerne Theme oh mache, e Schritt uf die angere zuegah. Jung und Alt id Lösigsfindig mit ibezieh und frauem: Ds Dach, d AHV, so saniere, dases die nächschte 30 Jahr het, u nid i 2 Jahr wider gflickt muess wärde.

Zämäfassend chame sägä, dasmir üsi Verantwortig müsse wahrnäh. D Verantwortig gägeüber üsne Nachkomme aber oh d Verantwortig gägeüber dr Gseuschafte im hie und jetzt. Es isch Ziit, dasmr zrügge finge, zu üsere Wäutoffeheit, zu üsem Innovationsgeist und genauso wie üsi Vorfahre oh vor Ininvestitione nid zrügge schrecke. Wemer stah blibe, wärde mir links und rächts überhout.

Wage mir dr Schritt vorwärts. Es isch ziit, d Chace z nutze wo sech üs biete. Und, ja, wemer d Chance wei nutze, wemr wei vorwärts gah und wider pioniere furd Wäut wärde, choschtet ds oh öppis. Aber mir hei ir vrgangeheit nid drum investiert, wüu mir z viu gäud kah hei. Sondern wüu mir gwüsst hei und wüsse, dass sech richtigi investitione lohne. Egau ob mir ine nöii, zuekunftswiisendi Technologie investiere, wie vor 138 Jahr id Isebahn oder hüt i erneuerbari Energie. Oder d Investition ines Glacé vomne Oberstufe Schüeler, wo zu töiife Sympathie mitem Nachbarsdorf fűehrt.

Es ligt a üs, was fürne Zuekunft mir üsne ching und Enkle wei hingerlah. Ob mir üses gerbte Huus löh la vrlottere oder obmirs wiiterentwickle und renoviere und ihne so es Huus mit solidem Fundament, guetem Mitubou und wasserdichtem dach hingerlöh. Ig für mi Teu bi aber überzügt, das mr zämä ar nächschte Generation es intakts deheim und sones Chanceland chöi hingerlah, wi ig z glück ha kah dri gebore z wärde.

Uf üsi grossartigi Schwiz – und druf, dasi no di nächschte 728 Jahr so brilliant blibt.